



REGIONE AUTÒNOMA DE SARDIGNA
REGIONE AUTONOMA DELLA SARDEGNA



COMUNU DE SESTU
TZITADI METROPOLITANA DE CASTEDDU

Progetu finantziau cun su dinai de sa Regione Autònoma de Sardigna cunforma a sa L. 482/99 e a sa L.R. 22/2018.

«Dichiara il tuo sì in Comune» Su 16 de abrili Sestu pigat parti a sa Dii natzionali po sa donatzioni de òrganus e tessidus de sa carena a incuru de s'Anci

Un'atzioni de impìnniu tzivili e unu sentidu de comunidadi. "Dichiara il tuo sì in Comune" est su slogan scioberau de s'Anci, s'assòtziu chi acàpiat prus de 8milla comunus de s'Itàlia, impari a su Ministeru de sa Saludi e a su "Centro Nazionale Trapianti" po promovì sa decrarada de voluntadi a sa donatzioni de is òrganus. Est una voluntadi chi dònna tzitadinu de edadi majori podit espressai in su mamentu de s'arrelàsciu o de s'arrenovu de sa carta de identidadi.

In su 2021 sceti, su Sistema Informativo Trapianti at arregistrau prus de 3 millionis de decraradas, cun pagu de mancu de su 70% de adesionis a sa donatzioni post mortem.

In custu mamentu prus o mancu 8500 personis funt abetendi unu trapiantu, ma s'impìnniu de is mèigus e de su personali sanitariu non abastat: po sarvai una vida cun unu trapiantu serbit, ainnantis de totu, su scioberu de calincunu chi at scioberau de donai is òrganus cosa sua.

Comenti as a essi donadori? Dònna tzitadinu tenit sa possibilitadi de allistai su cunsensu suu me in s'Anàgrafi de su comunu in su mamentu de s'arrelàsciu o de s'arrenovu de sa carta de identidadi. Ma est possibili puru a donai su cunsensu a sa donatzioni po mesu de protzedura internet in su giassu www.sceglididonare.it allistendisì cun protzedura SPID. Chini non tenit s'identidadi digitali podit cumpilai e imprentai sa tesserreda de su donadori alloghendidda intra de is documentus suos, nendi, paris, a is familliaris cosa sua de custu scioberu.